



Туған өлкеміз тарихтың да, мәдениеттің де, өнердің де бастауында тұр. Арғы-бергі тарихқа тым тереңдемей-ақ Қызылорда астана болған шақтағы ұрпақ қамы үшін жасалған еңбектің өзін айтып тауысу мүмкін емес.

### БАЙТҰРСЫНОВТЫҢ ӘЛІПБИ ДЕ ҚЫЗЫЛОРДАДА БАСЫЛҒАН



Архив деректеріне үнілсек, 1925-1929 жылдары көптеген қалагерлердің кітабы Қызылордада басылған екен. Кітап туралы сөз қозғалғанда ойымызға ең бірінші кітапхана түсетіні жасырын емес. Қызылорда астана болған уақытта Сыр өңірінен қандай кітаптар шыққанын білу үшін облыстық кітапханаға барып, бірнеше туындыны оқыдық. Байыптап қарасақ, Ахмет Байтұрсынұовтың «Әліп Би» (Жаңа құрал) атты еңбегі 1926 жылы Қызылордада басылғаны. Бұл кітап осы күнге дейін жарық көрген басқа да әліпшелердің бастауы екенін ұмытпау қажет.

Бұдан бөлек Сәкен Сейфуллиннің «Тұрмыс толқынында», «Жер қазғандар», «Экспресс» атты туындылары, Лияс Жансүгіровтің «Сықақ», «Шөркей», «Сағанақ», «Жанқа» атты кітаптары да Қызылорда астана болған кезде осы қаладан шыққан. Бүгінгі психологтар негіз ететін Жүсіпбек Аймауытовтың «Психология» атты еңбегі де, Тұрар Рысқұловтың «Қазақстан» атты туындысы да Қызылордадан шыққан. 1929 жылға дейін жарық көрген кітаптардың кейбірі төте жазумен басылған. Бұл еңбектер бүгінде Ә.Тәжібаев атындағы облыстық кітапхананың «Сирек қорлар» бөлімінде тұр. Бұл жерде Ораз Исаев пен Смағұл Сәдуақасовтың да дүниелері бар екенін айта кеткен жөн.

Қызылорда елдің бас қаласы болған кезде Мұхтар Әуезовтің «Әдебиет тарихы» атты кітабы жарыққа шыққан. Бұл кітап басылған соң көп өтпей «сотталып» түгел дерлік жиналған екен. Қызылжаралылар барлық кітапты жинағанына сенімді болғанда ортеп жіберген. Тек бір данасы Ғабит Мүсіреповте сақталыпты. Бүгінде оқып жүрген Әуезовтің «Әдебиет тарихы» бізге Ғабит Мүсіреповтің арқасында жеткен.

2 БЕТТЕ

ӘЖУМАДІЛДӘУЛЫ

#### ■ СҰХБАТ

Ұлжан БАЙБОСЫНОВА, Қазақстанның еңбек сіңірген қайраткері:

## ЖАҚСЫЛЫҚТЫҢ ДӘНІН ЕГІП КЕТСЕМ ДЕП ТҰРАМЫН



Бүгінгі сырлы сұхбатымыздың кейіпкері – жыршы, Қазақстанның еңбек сіңірген қайраткері, филология ғылымдарының кандидаты, Қазақ ұлттық өнер университетінің доценті, Қорқыт ата атындағы ғылыми-зерттеу орталығының жетекші ғылыми қызметкері Ұлжан Мәлікайдарқызы Байбосынова.

– Бүгінде елге танымал өнер иесісіз, әрі ұстазсыз. Осы танымалдыққа қол жеткізу жолында қаншама еңбектеніп, балалықтан даналыққа қадам бастыңыз. Өнер жолы қиын жол екенін білеміз. Өзіңіздің балалық шағыңыздан бастап осы өрлеу жылдарына шолу жасасаңыз...

– Өнер дариды. Туғаннан ата-анаға ғана баланың тула бойы қасиеті белгілі болады. Сол қасиетті тани білген ата-ана да, бала да бақытты деп білемін. Туғаннан бойымда бар өнерді таныған ата-анам осы өнер жолына қарай баули берді. Сыр бойы – жырауға тұнып қалған киелі жер. Оттың басында қандай да кісі басы қосылған жиын жыраусыз болмайтын. Нағашым жырау Әбдірасыл Жұбатқанов біздің шаңыраққа жиі келіп, жыр жырлайтын. Ол кісі таңды таңға асыратын даңғайыр жырау еді.

«Әбу Шаһима», «Жарлы тәліп», «Сәдуақас сахи», «Ұры Қарға» және көптеген Сыр бойы ақын-шайырларының термелтолауларын жырлағанда тыңдаушы таң асырып, тыңдаудан жалықпайтын. Мен ес біле бастағаннан жырау тыңдап дағдыландым. Жыраулық өнер саналы өмірге қадам бастырып, өзі тәрбиелей берді. Үш жасымда бойымдағы өнерді таныған ата-анам, көпшіліктің ортасында ұстады, жырау келсе алдына отырғызды. Алты жасымда мектепке емес, музыка мектебіне аман жетектеп апарып, қолыма домбыра ұстатты. 8 жасымда алғаш рет «Мақтұмқұлдың термесін» орындап мектеп сахнасына шықтым. Сахнаға шыққаным биял 42 жыл болады екен. 3 БЕТТЕ

# МЕН САҒАН ҒАШЫҚПЫН, ҚЫЗЫЛОРДА!

– Көкірегімнің үміті мен тілегі,  
Күй боп түлеп, күн боп шығып күледі.  
Күн астында көк төбелер түледі,  
Менің елім, менің елім – гүл елі!

Жүмекен НӘЖІМЕДЕНОВ



Қазақтың заңғар ұлы, алып ақыны, ұлттың болмыс-бітімін бойына түгел жиған халқымыздың қыран баласы, мемлекеттік әнұранымыздың авторының бірі Жүмекен Нәжімеденовтей тұлғаның қаламынан туған жыр жолдарын мақаланың беташары ретінде алып отырмыз. Өйткені Жүмекендей ақынның туған ел хақындағы осы бір өлеңі оқыған жанға ой салары анық. Ал бұл туындыны ақындардың

елі, батырлардың жері, руханият атаулының қайнар бұлағы, Алаштың анасы атанған Сырдың қасиетті топырағынан нәр алған, жігерін жасытпаған, намысын тапталмаған, туған жерге ту болып тігілген осы өлкенің арлы, ойлы, саналы азаматтары оқыса рухтанып сала берері сөзсіз. Себебі туған жерге кіндігі байланған әр азамат өскен ортасының, елінің болашағы кемел болғанын жан-тәнімен қалайды. Ондай

адам – Отанына шын берілген патриот. Отанына шын берілген адам туған жерді түлету әр азаматтың борышы һәм ортақ міндеті екенін жақсы түсінеді.

Бүгін өзін жақсы көретін Қызылорда қаласы жайлы көсіле жазғанды жөн көрдім. Өйткені ол – облысымыздың бас қаласы ғана емес, сондай-ақ Сыр елінің жүрегі.

2 БЕТТЕ

## Индустриялық аймақ – кәсіпке «жерұйық»

Экономиканың күретамыры – өндіріс. Ел әлеуетінің көрсеткіші, жұмыспен қамтудың баламасы да осы салаға тікелей тәуелді. Сондықтан болар, тәуелсіздіктің алғашқы жылдары өңірлер арнайы экономикалық аймаққа бөлініп, Қызылорда облысы да ерекше қолдауға кенелді. Шатқаяқтап тұрған шаруашылықтар қалыпқа келіп, Үкімет нарық заңына икемделе алмаған өнеркәсіптерді қолтықтан демеді. Міне, араға қаншама жыл салып, Сыр жұртшылығы сол қарқынды істің жемісін көруде.



Әйтсе де әлі қолдауды тоқтататын кезең емес. Әлемдік ахуал мен экономикалық жағдай халықтың оңтайлы өмір сүруіне толық мүмкіндік бермей келеді. Кіріс көзін кеңейту, жұмыссыздық деңгейін түсіру үшін атқарар жұмыс

жетерлік. Мұның жалғыз шешімі тағы да өндірісті дамыту, жүйелі қолдау екені айтпаса да анық. Осы орайда шаһар басшылығының 3 жыл бұрын қолға алған тиімді қадамы – индустриялық аймақ құру идеясы туралы ой тарқату орынды секілді.

Аталған жоба өңір экономикасына пайда әкеліп қоймай, әлеуметтік мәселелердің шешілуіне түрткі болмақ.

Нақтырақ айтқанда, 2020 жылы Қызылорда қаласы әкімдігі «Титов» тұрғын ауданынан индустриялық аймаққа жер учаскесін белгіледі. Көлемі де қомақты. 366 гектарды құрайды. Мұндай ауқымды аумаққа бірнеше кәсіпорынды жинақтап, арнайы экономикалық парк құру көзделген еді. Осы мақсатта аталған индустриялық аймаққа 5.7 млрд теңгеге қажетті инженерлік инфрақұрылым жүйелері жеткізілді. Автокөлік жолы, газ, электр желісі, тіпті темір жол түйығына дейін дайындалып, бар мүмкіндік қарастырылған. Тек кәсіпке құлынған азаматтар дайын болып, кәсіпорынды салуға бел буса болғаны.

Әрине, мұндай қолдаудан кім қашсын?! Орта және ірі кәсіпорын егелері түрлі ұсыныс білдіріп, индустриялық аймаққа табан тіреуге асықты. Нәтижесінде, әкімдік 83,2 гектарды құрайтын 7 жер учаскесін инвесторларға табыстаған болатын. Бүгінде индустриялық аймақта 42.4 млрд теңгені құрайтын 2 жоба іске қосылған.

2 БЕТТЕ

## ЖАЗҒЫ АЗИЯ ОЙЫНДАРЫ: СЫР САҢЛАҚТАРЫНЫҢ МЕРЕЙІ ҮСТЕМ

Спортсүйер қауымның 15 күн бойы тақымын қысып, байрақты бәсекеге жанкүйер болған XIX жазғы Азия ойындары өз мәресіне жетті.

Қытай елінің Ханжоу қаласында өткен Азия ойындарына елімізден 524 спортшы қатысып, спорттың 30 түрінен бақ сынады. Ел намысы сынға түскен бәсекеден Сыр спортшылары да шет қалмады. Аймақтан шыққан 23 спортшы бокс, дзюдо, грек-рим күресі, ауыр атлетика, каратэ, таеквондо, стенд ату, шахмат, мауинбайк, велотрек, е-спорт, гандбол, көгалдағы хоккейге сынға түсті. 4 БЕТТЕ







